



中国经典名著

# 全唐诗

(三十三)

黄怀仁 齐思明 校正

学苑音像出版社

## 目 录

第六百零四卷.....	1
第六百零五卷.....	22
第六百零六卷.....	33
第六百零七卷.....	43
第六百零八卷.....	49
第六百零九卷.....	64
第六百一十卷.....	80
第六百一十一卷.....	93
第六百一十二卷.....	108
第六百一十三卷.....	120
第六百一十四卷.....	146
第六百一十五卷.....	167
第六百一十六卷.....	181
第六百一十七卷.....	190
第六百一十八卷.....	201
第六百一十九卷.....	216
第六百二十卷.....	228
第六百二十一卷.....	243
第六百二十二卷.....	255
第六百二十三卷.....	264
第六百二十四卷.....	275
第六百二十五卷.....	290
第六百二十六卷.....	304

## 第六百零四卷

送前汝州李侍御罢归宣城

许棠

吟诗早得名，戴豸又加荣。下国闲归去，他人少此情。  
云移寒峤出，烧夹夜江明。重引池塘思，还登谢朓城。

失题（一作送前汝州李侍御罢归宣城第二首）

许棠

独夜长城下，孤吟近北辰。半天初去雁，穷磧远来人。  
月黯氛埃积，风臃帐幕邻。惟闻防虏寇，不语暗伤神。

送裴拾遗宰下邳（一作赴畿令）

许棠

受谪因廷谏，兹行不出关。直庐辞玉陛，上马向仙山。  
地古桑麻广，城偏仆御闲。县斋高枕卧，犹梦犯天颜。



隗嚣宫晚望

许棠

西顾伊兰近，方惊滞极边。水随空谷转，山向夕阳偏。  
磧鸟多依地，胡云不满天。秋风动衰草，只觉犬羊膻。

江上行

许棠

片席随高鸟，连天积浪间。苇宽云不匝，风广雨无闲。  
戍影临孤浦，潮痕在半山。东原归未得，荏苒滞江关。

登山

许棠

信步上鸟道，不知身忽高。近空无世界，当楚见波涛。  
顶峭松多瘦，崖悬石尽牢。猕猴呼独散，隔水向人号。

哭宣城元征君

许棠

高眠终不起，远趣固难知。琴剑今无主，园林旧许谁。  
苔封僧坐石，苇涨鹤翘池。后代传青史，方钦道德垂。



寄建州姚员外

许棠

诬讐遭遇谪，明君即自知。乡遥辞剑外，身独向天涯。  
岭堠蛮云积，闽空瘴雨垂。南来终不遂，日探北归期。

送厉校书从事凤翔

许棠

赴辟依丞相，超荣事岂同。城池当陇右，山水是关中。  
日有来巴使，秋高出塞鸿。旬休随大旆，应到九成宫。

春夜同厉文学先辈会宿

许棠

江汉久分路，京关重聚吟。更为他夜约，方尽昔年心。  
月隔明河远，花藏宿鸟深。无眠将及曙，多是说山阴。

长安书情

许棠

疏散过闲人，同人不在秦。近来惊白发，方解惜青春。  
僻寺居将遍，权门到绝因。行藏如此辈，何以谓谋身。



过故洛城

许棠

七百数还穷，城池一旦空。夕阳唯照草，危堞不胜风。  
岸断河声别，田荒野色同。去来皆过客，何处问遗宫。

寄庐山贾处士

许棠

时泰亦高眠，人皆谓不然。穷经休望辟，饵术止期仙。  
彭蠡波涵月，炉峰雪照天。常闻风雨夜，到晓在渔船。

下第东归留别郑侍郎

许棠

无才副至公，岂是命难通。分合吟诗老，家宜逐浪空。  
别心悬阙下，归念极吴东。唯畏重回日，初情恐不同。

泗上早发

许棠

独起无人见，长河夜泛时。平芜疑自动，落月似相随。  
楚外离空早，关西去已迟。渔歌闻不绝，却轸洞庭思。



赠天台僧

许棠

赤城霞外寺，不忘旧登年。石上吟分海，楼中语近天。  
重游空有梦，再隐定无缘。独夜休行道，星辰静照禅。

冬夜与友人会宿

许棠

君初离雁塞，我久滞雕阴。隔闰俱劳梦，通宵各话心。  
禁风吹漏出，原树映星沉。白昼常多事，无妨到晓吟。

送元遂上人归吴中

许棠

落发在王畿，承恩著紫衣。印心谁受请，讲疏自携归。  
泛浦龙惊锡，禅云虎绕扉。吴中知久别，庵树想成围。

赠志空上人

许棠

了了在心中，南宗与北宗。行高无外染，骨瘦是真容。  
饭野盂埋雪，禅云杖倚松。常修不住性，必拟老何峰。



边城晚望

许棠

广漠杳无穷，孤城四面空。马行高碛上，日堕迥沙中。  
逼晓人移帐，当川树列风。迢迢河外路，知直去崆峒。

汴上暮秋

许棠

独立长堤上，西风满客衣。日临秋草广，山接远天微。  
岸叶随波尽，沙云与鸟飞。秦人宁有素，去意自知归。

春日言怀

许棠

东风万物新，独未到幽人。赋命自多蹇，阳和非不均。  
五陵三月暮，百越一家贫。早误闲眠处，无愁异此身。

奉天寒食书事

许棠

处处无烟火，人家似暂空。晓林花落雨，寒谷鸟啼风。  
故里芳洲外，残春甸服中。谁知独西去，步步泣途穷。



长安寓居

许棠

贫寄帝城居，交朋日自疏。愁迎离碛雁，梦逐出关书。  
经雨蝉声尽，兼风杵韵馀。谁知江徼塞，所忆在樵渔。

写怀

许棠

此生居此世，堪笑复堪悲。在处有岐路，何人无别离。  
长当多难日，愁过少年时。穷达都判了，休闲镊白髭。

白菊

许棠

所尚雪霜姿，非关落帽期。香飘风外别，影到月中疑。  
发在林凋后，繁当露冷时。人间稀有此，自古乃无诗。

中秋夜对月

许棠

月月势皆圆，中秋朗最偏。万方期一夕，到晓是经年。  
影蔽星芒尽，光分物状全。惟应苦吟者，目断向遥天。



陪郢州张员外宴白雪楼

许棠

高情日日闲，多宴雪楼间。洒槛江干雨，当筵天际山。  
带帆分浪色，驻乐话朝班。岂料羈浮者，樽前得解颜。

和薛侍御题兴善寺松

许棠

何年鬪到城，满国响高名。半寺阴常匝，邻坊景亦清。  
代多无朽势，风定有馀声。自得天然状，非同涧底生。

题郑侍郎岩隐十韵

许棠

朝退常归隐，真修大隐情。园林应得趣，岩谷自为名。  
野步难寻寺，闲吟少在城。树藏幽洞黑，花照远村明。  
海石分湖路，风泉递雨声。性高怜散逸，官达厌公卿。  
架引藤重长，阶延笋迸生。青门无到客，紫阁有来莺。  
物外身虽隐，区中望本清。终难依此境，坐卧避钧衡。



宿灵山兰若

许棠

江心天半寺，一夕万缘空。地出浮云上，星摇积浪中。  
滴沥垂阁雨，吹桧送帆风。旦夕闻清磬，唯应是钓翁。

亲仁里双鹭

许棠

双去双来日已频，只应知我是江人。对欹雪顶思寻水，  
更振霜翎恐染尘。三楚几时初失侣，五陵何树又栖身。  
天然不与凡禽类，傍砌听吟性自驯。

成纪书事二首

许棠

东吴远别客西秦，怀旧伤时暗洒巾。满野多成无主冢，  
防边半是异乡人。山河再阔千馀里，城市曾经一百春。  
闲与将军议戎事，伊兰犹未绝胡尘。  
蹉跎远入犬羊中，荏苒将成白首翁。三楚田园归未得，  
五原岐路去无穷。天垂大野雕盘草，月落孤城角啸风。  
难问开元向前事，依稀犹认隗嚣宫。



秦中遇友人

许棠

半生南走复西驰，愁过杨朱罢泣岐。远梦亦羞归海徼，  
贫游多是滞边陲。胡云不聚风无定，陇路难行栈更危。  
旦暮唯闻语征战，看看已欲废吟诗。

过分水岭

许棠

陇山高共鸟行齐，瞰险盘空甚蹊梯。云势崩腾时向背，  
水声呜咽若东西。风兼雨气吹人面，石带冰棱碍马蹄。  
此去秦川无别路，隔崖穷谷却难迷。

讲德陈情上淮南李仆射八首

许棠

天降贤人佐圣时，自然声教满华夷。英明不独中朝仰，  
清重兼闻外国知。凉夜酒醒多对月，晓庭公退半吟诗。  
梁城东下虽经战，风俗犹传守旧规。  
多朝轩冕冠乾坤，四海皆推圣最尊。楚玉已曾分卞玉，  
膺门依旧是龙门。筵开乐振高云动，城掩鞞收落日昏。



尝念苍生如赤子，九州无处不沾恩。  
未领春闱望早清，况联戎阃控强兵。风威遍布江山静，  
教化高同日月明。九郡竟歌兼煮海，四方皆得共和羹。  
东南自此全无事，只为期年政已成。  
帝念淮孺疫疹频，牢笼山海委名臣。古来比德由无侣，  
当代同途岂有人。夜宴独吟梁苑月，朝游重见广陵春。  
多年疲瘵全苏息，须到讴谣日满秦。  
三纪吟诗望一名，丹青待得白头成。已期到老还沾禄，  
无复偷闲却养生。当宴每垂听乐泪，望云长起忆山情。  
朱门旧是登龙客，初脱鱼鳞胆尚惊。  
东来淮海拜旌旗，不把公卿一字书。曾侍晚斋吟对雪，  
又容华馆食兼鱼。孤微自省恩非次，际会谁知分有馀。  
唯耻旧桥题处在，荣归无计似相如。  
平生南北逐蓬飘，待得名成鬓已凋。寒浦一从抛钓艇，  
旧林无处认风飙。程途虽喜关河尽，时节犹惊骨肉遥。  
愁策羸蹄更归去，乱山流水满翻潮。  
丹青空把桂枝归，白首依前着布衣。当路公卿谁见待，  
故乡亲爱自疑非。东风乍喜还沧海，栖旅终愁出翠微。  
应念无媒居选限，二年须更守渔矶。



献独孤尚书

许棠

虚抛南楚滞西秦，白首依前衣白身。退鷁已经三十载，  
登龙曾见一千人。魂离为役诗篇苦，泪竭缘嗟骨相贫。  
今日鞠躬高旆下，欲倾肝胆杳无因。

将过单于

许棠

荒碛连天堡戍稀，日忧蕃寇却忘机。江山不到处皆到，  
陇雁已归时未归。行李亦须携战器，趋迎当便著戎衣。  
并州去路殊迢递，风雨何当达近畿。

贞女祠

许棠

何穴藏贞骨，荒祠见旧颜。精灵应自在，云雨不相关。  
落石泉多咽，无风树尽闲。唯疑千古后，为瑞向人间。



宿华山

许棠

异境良难测，非仙岂合游。星辰方满岳，风雨忽移舟。  
喷月泉垂壁，栖松鹤在楼。因知修养处，不必在嵩丘。

送张员外西川从事

许棠

为郎不入朝，自是赴嘉招。豸角初离首，金章已在腰。  
剑横阴绿野，栈响近丹霄。迎驿应相续，悬愁去路遥。

题慈恩寺元遂上人院

许棠

竹槛匝回廊，城中似外方。月云开作片，枝鸟立成行。  
径接河源润，庭容塔影凉。天台频去说，谁占最高房。

送杜仓曹往沧洲舘叔常侍

许棠

浮阳横巨浸，南巷拥旌旃。别带秦城雨，行闻魏国蝉。  
磧鸿来每后，朝日见常先。东鄙云霞广，高林间水天。



雕阴道中作

许棠

五月绥州北，途程少郁蒸。马依膾草聚，人抱浊河澄。  
迹固长城垒，冤深太子陵。往来经此地，悲苦有谁能。

留别从弟郴

许棠

同承太岳胤，俱值太平时。丹陛怀趋计，沧洲负去期。  
久贫成蹭蹬，多病惜支离。宗分兼交分，吾知汝亦知。

寻山

许棠

蹑履复支筇，深山草木中。隔溪遥避虎，当坞忽闻钟。  
落叶多相似，幽禽半不同。群獠呼却散，如此异林翁。

送徐侍御充南诏判官

许棠

西去安夷落，乘轺从节行。彤庭传圣旨，异域化戎情。  
瘴路穷巴徼，蛮川过峽城。地偏风自杂，天漏月稀明。



危栈连空动，长江到底清。笑宜防狒狒，言好听猩猩。  
抚论如敦行，归情自合盟。回期佩印绶，何更见新正。

送省玄上人归江东

许棠

释律周儒礼，严持用戒身。安禅思剡石，留偈别都人。  
雨合吴江黑，潮移海路新。瓶盂自此去，应不更还秦。

送刘校书游东鲁

许棠

内阁劳雠校，东邦忽纵游。才偏精二雅，分合遇诸侯。  
暗海龟蒙雨，连空赵魏秋。如经麟见处，驻马瞰荒丘。

送金吾侍御奉使日东

许棠

还乡兼作使，到日倍荣亲。向化虽多国，如公有几人。  
孤山无返照，积水合苍旻。膝下知难住，金章已系身。

